

天真閣集

天真閣集卷三

詩三

昭文 孫原湘 子瀟

十四夜月

今夜月明殊可喜未圓已具將圓理譬如遠客忽歸來望到家
門二三里明夜團圓亦可喜圓極翻憂闕從起世閒萬事莫太
盈請君仰首看月明

中秋夜湖上看月

臥見月色好披衣爲月起踏月出門去遙遙不計里我家樓中
月先來湖上矣湖橋三洞環月射直如矢一洞一月明貫穿三
珠似遠風蕩波開飛劍散秋髓化作千萬珠蛟龍攫不已青天
祇一月萬變隨境徙浩歌歸去來月在天心裏

重九日張子和邀同王次嶽明經岱吳竹橋禮部蔚光

邵元直教授

培惠

西山宴遊因憶家大人蜀中次子

和韻

今日不行樂明日已成昔如此好秋光因循殊可惜况逢神仙
儔遊戲共飛舄出郭風吹衣山靈遠相逆去年登高時上黨松
烟碧侍親涉崇岡嘯詠悖憤積親歌蜀道難予歸蒼耳摘心魂
逐去旌劒閣森矛戟重闌奉慈歡駐景少丹液落木感夏秋飛
霜凜晨夕獨居屏世事閉戶謝過客我有九品官能轉羣眼白
我有百晦田能買衆膽赤貧賤知己難不如澗阿窄家臨尙湖
濱氣若雲夢澤萬頃足徜徉一空世險阨美人素書來招我天
咫尺揮手笑謝之我無雙羽翮山中宰相安繩牀免跼蹐方外
司馬榮白衣少遷謫安得宦遊人歸主湖山席黃花香可搴紫
蟹肥可擘暇且拾橡斗饑亦餐松栢昨夢披紫霞太清恣遊適

二十八星宿赤手可採摭三十六天門一氣能開闢醒後秋風
寒身猶衣絺綌上有親淚痕服之不忍易爲子能幾時良辰任
拋擲故鄉不見親誠不如行役茲辰遇諸公舊仰聲譽藉頻年
走風塵蹤迹致乖隔何期一席間竟得三友益碧海探蛟珠紫
府搜鮒壁如挽銀河波力洗塵履蹟清游非偶然佳境豁胸臆
願趁楓葉期再蠟阮孚屐同具煙霞情各暢山水癖我苦無田
租不能具肴核亦喜無田租冬日多暇隙

遣僮

翩翩小史最神清五載相隨萬里行同出廬龍看海色並騎邊
馬聽秋聲聰明解奉王褒約喜怒能知穎士情今日遣歸休灑
淚有人頭白倚柴荆

題次嶽西莊草堂

草堂無日不宜詩秋水秋山是我師屋在畫中紅樹抱人來橋外白鷗知一莊欲奪王維勝半世誰憐杜甫飢搔首問天天不語如君四十尙羈雌

挂起西窗浪接天烟波絕勝米家船更無老屋遮秋去常比高樓得月先四季詩情排日寫一生心事抱雲眠玉郎努力西莊住不數前朝小輞川

前明吾鄉錢侍御岱所居名小輞川極園亭聲伎之樂

吳竹橋先生招同邵元直邵敦夫上舍

垂應

郭小若秀

才梓材

食蟹疊前韻

悲秋非悲秋悲今不如昔飲酒非飲酒飲之時可惜開筵主賓歡雜坐錯履舄亦自羹蓴鱸非以止嘔逆燈光與酒光秋影混一碧初看黃甲登纍纍黃金積擅輿各紛拏山果獼猴摘或先持其螯如戰奪兩戟或先吸其脂如仙服丹液或先盡一筐謂

足飽今夕或先去六跪謂不足讓客或喜擘狼鯁西施乳方白
或喜噬團臍楊妃舌比赤或誇搜剔工空腹窮其窄或矜咀嚼
能退殼遺膏澤或食不撤薑寒恐爲胃厄或飲必乞醯腥恐病
腹尺或且暢豪飲飛觴健鷹翻或但恣飽餐禮數忘踟躕食頃
忽有思公子何淪謫博帶殊美觀江湖占一席擁劒氣何雄力
拒饑龍擘執穗朝其魁指江潤泊栢聚族爲前驅撥櫂殊自適
何緣入沙中郭索遭鉤撫觸薄步已僵登俎甲遂闕含黃外賜
緋表出同衿綵却憶橫行時千人皆辟易無腸恣饕餮斂齋窟
中擲肥軀爲誰甘辛苦如徭役八月稻粱謀九月空狼藉安得
秋水冰長與緯蕭隔借物卽鏡人朵頤得規益多藏物且亡惟
罪同懷璧食罷各酒酣踏月印歸蹟雌黃淨口中介冑消胸臆
月晦蟹益肥再訂尋秋履異味如異書老饕中有癖細擘紅玉

膏佐以青田核急讀爾雅篇無蹈蔡謨隙

短歌行

名花不落視如草美人不死視如媼世人變月乍圓卽闕神龍
異鯉見首不尾一見令人喜不見令人思習見便生厭何如未
見時

少年行

天雞叫日東海頭少年意氣輕王侯一語不合意怒拔雙吳鉤
傾情倒意無所惜當筵笑脫千金裘樂莫樂春花開愁不愁秋
風來不見鄧仲華十三誦詩書廿四登司徒賈誼才高屈下位
二十亦爲中大夫男兒不能致君堯舜澤萬物坐看白日出復
沒少年胡不早自決我思張子房法爲王者師不逢圯上老人
教雖有血氣之勇將何爲

長相思

長相思乃在羅浮之巔瀟湘之浦林木黯慘風浪駭怒陸無車
兮川無梁欲往從之路修阻傳說不入夢鹽梅竟何補仲尼莫
能容蘭與衆草伍駿馬伏櫪鷹鍛羽惟有鴝鵒叫屋角狐狸竄
荒圃長相思淚如雨

古劍歌

當天拔鞘青天驚寒光四射陰風生愁冤隱隱鞘中泣千年血
點桃花溼此鐵當時出誰手曾斷忠頭或佞首更百年後落誰
手用以斬蛟抑屠狗鐵性寧知仁不仁以生以殺存乎人用之
并無利不利成則爲良敗則棄卽今閒置無所須逕欲改作犁
與鋤夜深青龍破壁嘯未肯埋沒隨田夫劍乎願從堯舜治廟
堂四凶盡殺天光昌從此藏之武庫萬萬載土蝕沙沈亦無悔

生平不見坡公小楷馮仲廉孝廉偉以拓本見貽石係

婁東江氏物今在張文江太守

瞻洛

家前書歸去來

辭及自爲詩十首哨遍一首後書赤壁二賦風骨遒勁輔以邁往之氣凜然如見公也展玩數四可補生平缺陷矣再疊益字韻題後

先生宰相才不見用於昔寄託筆墨閒宛轉自矜惜君王誠聖明棄我奚如舄良由儉王譴轉覺孤臣逆不如歸去來開逕種松碧偶爲邪老書遂觸心鬱積時方守黃州文史罷甄摘身辭玉陛塵心戀金鑾戟芒屨點秋山松醪酌春液忽聞移汝命逝將去朝夕五年懼咎身萬里天南客既不獲放歸霜雪頭將白又不獲見君葵藿心徒赤自憐臣罪深敢謂君恩窄一官屢折腰大似陶彭澤感懷神宗朝政令多阻阨知人才實難胡限以

繩尺知不忍終棄胡鍛其羽翮誠思祖宗語汗愧滋局踣雷爲
子孫用不用轉遷謫汝州豈稱公徒復移此席知己相送來手
把蠻箋擘殷勤乞公書畱當萊公柏前辭益後賦行行細勻適
十詩兼一詞語語工拮據想公下筆時忠憤獨開闢飢寒并日
身玉帶等絺綌螻蟻試雷霆臣愚豈改易猶狗容鼠奸國紀久
拋擲夢裏裁睂高煙霞赴行役眼前赤壁雄杯盤記狼藉思歸
復思黃總悵君門隔卽書見公志可以教忠益無怪賞鑒家珍
祕逾金璧他僅筆法傳此更傳心蹟譬若起公生爲我傾肝鬲
較勝黃涪翁懸像拜筵展生平嗜公書苦未歷深癖所見字擘
窠小亦如果核獲觀細蠅頭快補生平隙

放歌行題竹橋先生湖田書屋卷子

湖山天然名畫手富貴中人不能有此樂讓與耕田夫日日飽

看黃子久竹橋先生思奪之每逢山水必有詩玉堂畫省苦縛束不如湖田結茅屋六月荷花湖上開先生拂衣歸去來歸來清風兩袖灑書屋原無一錢買仙人何嘗造玉京世無其蹟留其名意匠爲經營畫手爲落成墨花怒噴烟雲并濛濛但覺楊柳桃花明詩人肯作湖山主湖山豈禁詩人取萬頃烟波盡屬公何必湖田一寸土明湖作田田作邑此卷風吹不改色後人若羨卷中人一品功勳纔換得

喜聞母恭人歸自上黨舟迎至許墅待曉關作

一夜喜無阻嚴關待啓時船多先放貨法在敢容私老眼思歸急慈顏望見遲難將此中意說與吏人知

毘陵舟次迎見泫然道感

膝前悲喜淚滂沱老瘦都緣事轡軻遠道更兼風雪早衰年偏

是別離多清還照影家鄉水險尙驚心宦海波一語差堪先慰
藉白頭祖母體安和

得淵如關中書

一緘帶得九邊沙客滯秦關鬢易華風霍近聞回紇馬河山舊
是帝王家賈生欲老吳公幕子美空尋杜曲花生壘黃鸝呼酒
罷新詩一一入秋笳

馮仲康將歸婁東過訪語別

歲晚衆響寂爲君張素琴寒雲歸櫂重落葉閉門深避俗文章
手清時老病心隱湖一片月相送梅花林

與舍弟

原滯

西山展會大父墓

乍喜天涯返相攜拜墓門一碑風雨色萬木采樵痕客久荒畚
築家貧薄酒尊老親猶遠宦南望定消魂

老鵬行

羣飛翬翬黑雲蔽霄集彼官倉以吸民膏匪吸民膏倉中餘粟
如山高一解倉有巨鼠牙爪如虎收十斛米而匿其五鼠曰咄
咄吾族辛苦乃澤爾毛羽二解奪我鼠糧耗彼官倉官倉不可
耗非爾民其誰償三解鴉飽民飢鼠妬爾肥爾肥如雞兮可以
遠飛胡增繳之在前而昧於知幾四解田中有薪林中有榛奚
不往啄而鼠肥是分懲爾以示民俾民知鼠之尊五解羽不可
爲儀鳴不可知時盡殲此族其奚辭但問倉中鼠亦盜官糧蝕
官庫張湯小兒胡不捕六解

太守來

太守來來蘇我民我民共仰太守仁冤苦不得上訴公堂聞昨
日完糧到倉口一石多攜三四斗縣官嫚罵道不足耗羨今年

外加六不盈此數糧不收黑夜擔歸雙淚流明朝破衣入質庫
不足還須脫布袴道逢儒巾人攘臂爲不平與其飽官寧飽紳
盡寄鄉戶歸紳名彼雖爲利非好義猶勝官吏多欺凌我舍我
利圖我寧惟望仁者爲澄清昨聞太守來夾道歡呼迎太守爲
民殲貪吏太守爲民治漕弊呵騶遙遙下倉門有吏持錢夜捉
人微聞旁人道名姓執縛多是儒衣巾吁嗟太守來來蘇我民
我糧依然我自完加六不止加七寬但見儒衣銀鐙跪堂下太
守堂上霽顏迎縣官

臘雪

今歲秋亢旱歷冬無蕭辰不冰亦不雪殘臘溫如春無衣各相
慶謂是天恤貧庸知伏藏候宜斂不可伸邪氣中人骨交春疾
叢身肥蠶冬不藏兼恐螟螣新萬物昧其原憂患生因循深宵

惻然念寒威襲重茵窗虛忽生白啓視飛玉塵明朝路人怨凍
骨衣懸鶉吁嗟若曹愚詎識蒼天仁大造自無私實愛此下民
幸各勉用力以俟豐年臻安得解我衣盡蓋凍死人

白練篇

并序

哀吳烈婦也烈婦錢氏適吳旭明逾年吳死婦有殉
志家人諷以方娠冀緩之未幾卒縊死

白練復白練是郎眼所見昔日合歡絲今日斷頭綫一解夫亡

妾宜死妾死絕夫孕匏瓜雖無郎腹中疑有子二解失偶冀得

雛根死枝不枯庸知魚病腹誤認蚌孕珠三解珠胎虛不飽悔

不從夫早夫有白頭親夫有兄與嫂四解生無戀於世死乃畢

吾志弟葬是兄責弟後是兄事五解與爲生鳳凰寧作死鴛鴦

生緣一年短死緣千歲長

六解

旃蒙大荒落

元日

皇帝五十載昌籙開一元十行寬大
詔字字含春溫庶民若
庶草九重庇其根父老澤尤厚感且召子孫我年二十一
二十度寒暄不見兵戈攘不爲饑饉奔幸生太平世拜手稽首言
願

皇帝陛下永永履

至尊倍此五十載不倦治乾坤臣年七十一亦得杖朝門衰
老備驅策以答浩蕩恩

人日思親

花前聽雨思冥冥酒到尊中手忽停萬里勞臣雙鬢白十年人
子一袍青叢叢著作堆秋葉落交游數瞻星蜀道難如天上

遠題詩何處草堂靈

同吳竹橋丈邵元直范東叔秀才

春林

探梅致道觀

春風滿城郭出門無不宜好友人二三如與春風期飄來梅花香清我心與脾不知何處開隨香信所之香氣忽不覺舉頭見南枝

偶來梅花下身意俱梅花頓覺天地空此外非吾家并此雪滿枝亦復空繁華落花點我衣焉知非夢耶美人在天半天矯如飛霞

我行梅花外香氣與我俱行到竹深處別有雪一株絕無人賞玩彌覺花敷腴淡極不知春此意誰得如我亦一明月花其知我無

子和家絳雪樓杏花

東風吹我入君家邀我登樓看杏花杏花纔開十之五眼前已
覺明如霞明霞欲落春樹接百疊春雲上頭壓求其不似梅花
處對客宛然開笑壓花枝含笑人有思我思去年花下時上黨
官齋一株銷設宴張燈共歡飲繁枝一照紅徹天山香舞罷春
雲顛回頭却憶故園樹有花枝處無人住今日登樓翻欲愁不
如客中思此樓客中之花豈足戀曾在花前奉白頭人生作客
思歸早歸時又覺天涯好一度看花一度情花亦笑人容易老
願君酌我金叵羅花前百壺花下歌看花且盡今日醉明日之
事知如何

花朝歌

春煙如水畫曉晴百花枝上雙禽鳴金屏十二照春豔春人出
簾春有聲手勸花神一卮酒親翦紅綃繫花肘願人不老似花

顏願花不落如人壽東風笑人情太癡樽桑花有紅殘時人生
萬事得半足春過今朝春漸綠春漸綠春始好春始好春已老
及此花開花未開少年努力登高臺黃金高積與臺等欲換青
春春不肯

思婦曲

春帆迢迢過小樓美人梳洗樓上頭碧天無際楚雲斷桃花一
樹明雙眸人見桃花笑儂見桃花愁春衫已卸湘水碧莫潮何
苦東南流前流益後流綠盡不知收新舟接舊舟遊人多好遊
流光逝水不知極去年今日河梁別

寒食吟

春陰如水水不流哭聲飛過青山頭暝烟漠漠人悄悄小蝶尋
覓出深草枯骨埋深恨更深紙錢滿地生黃金杜鵑沿山紅欲

裂寡婦孤兒眼中血

故人齋頭海棠盛開適以事阻往視已零落矣感而賦

此

今年海棠何草草不待人閒便開早主人指點落來花爲待君
看不曾埽我聞此言心悄悄偏我來時美人老東風弄雨復作
晴催送瓊仙入瑤島平生夢花如夢才張眼偏放花空開花開
近在故人室咫尺猶然成隔絕不知有眼苦自障翻疑此樹無
花放有人日日對花前不會知道花可憐眼前埋沒亦已多四
海之大應如何

拜先大父墓

亦痛滴尊酒黃泉不得收已徒時食薦况有采樵憂戚里或新
貴子孫多遠游我生幸貧賤常得展松楸

載酒城西邀竹橋。丈次嶽元直東叔子和小飲。

拂面東風綠一涯。清明畫出輞川佳。鶯花盡帶幽人氣。烟水能消壯士懷。排日迭爲賓主勸。忘年宛似弟兄諧。此時不醉尊中酒。雲外青山笑爾儕。

酬許穆堂侍御寶善

公懸石爲鼓。我刻桐爲魚。扣之響必答。聲氣良不孤。雄談擗戟張。四座春風嘘。大道寓髣髴。諧聽者無賢愚。願爲雲間崔。百里相歌呼。皇皇廟堂器。猶恐蒼生須。所幸君子交。不以形蹟拘。明年春水生。寄我松江鱸。

對西山獨酌

我持一尊酒。萬物舍空濛。春山疑無根。動蕩由東風。藹藹空際雲。山爲雲提空。雲頭山不落。山脚雲疏通。溷漫溢春水。一氣鼓

盪中扁舟何處來上有垂釣翁笑指堂中客身爲雲氣籠

春泛

楊柳水邊驕桃花落似潮春人雙頰酒畫舫兩頭簫白鷺聞謳
立青山入浪搖歸途轉清曠暮雨爲瀟瀟

上巳日同人修禊三橋分韻得上字

東風吹斜陽挂在西南嶂倒影入明漪餘霞相滉漾孤舟櫂入
千花明花外烟波更清曠洗我琉璃鍾酌我葡萄釀萬物無心
供我娛我有愁心自惆悵惆悵復惆悵去歲登高樓上望劒擊
珊瑚慷慨歌聲情愈激金風壯其時茫茫何所愁雨散星離紛
萬狀諸君玉山各自頽至今酒痕猶污芙蓉帳昨日之日不可
畱明日之日知何向卽今落落素心人去年不道皆無恙吁嗟
我愁亦已多何不付春波一瀟瀟而與春雲共搖颺君不見蘭

亭流水去不回蘭亭春光自和暢醉來忘是人閒人春水船如
在天上

碧桃花歌

碧桃花花開如碧玉曉日煖如烟紗窗睡新足起來梳頭鸞鏡
前花光入鏡爭人妍一分輕紅九分白纔得如人好顏色輕陰
冥冥春弄愁碧雲壓得花低頭當年花下同行遍細語輕憐有
花見一自看花去上都玉窗兩度發仙株鉤鱗釣得桃花水不
見桃花一紙書書縱不可達夢亦應相尋夢中只見花枝而人
竟不如花有心東家夢郎被郎惱有夢不如無夢好郎如桃枝
影日疏妾如桃花顏日老或言妾如枝郎如花枝長只在深閨
裏花飛何時肯還家不愁天邊花亂飛只愁天涯人不歸歸來
願趁花顏色且祝東風莫漫吹

夢游仙

銀河欲乾瀉磬止手弄朝霞半天紫殷勤爲掃仙壇花千年碧
桃香不死玉女笑贈雙玉環飛煙乘鸞去不還蛾眉自畫天上
翠下視九點秋煙寰東皇醉我赤瑤露春寬茫如墮雲霧青天
走出碧海頭水上星辰畫來去

三月二十日王次嶽招同吳竹橋丈邵元直毛壽君上

舍

陳筠樵明經和草堂觀水嬉以西莊二字爲

韻

春山勢欲走而來就幽樓東風渡山色綠遍西莊西晴波接天
高一氣青無倪美人雲中來桂艇揚芳桂紅情溢淺渚香風塞
迴溪中流簫鼓聲擊破青玻瓈隄邊萬楊柳化爲奴與娛山水
不到眼萬物好尙齊此中有漁人儼認桃源迷我欲與之言烟

波渺渺兮

春色已如夢青山又斜陽萬象黯然失吾自愛草堂主人酌美酒勸客各一觴客亦酌主人相期駐顏光終朝不行樂青絲算成霜騏驎苟失所鹽車升太行鴛鴦偶得志食粟馳康莊通塞自有命好醜不可常茫茫身後名焉用心煩傷但願堂中醉春波與酒長

東垣薔薇爲風雨所偃筠樵過我呼童扶而植之

萬綠滿天地殘春賴汝紅心猶傾夕照生不被東風憐惜來佳客扶持喚小童轉思荆棘裏芳豔正何窮

再題西莊草堂

面臨山郭背村莊萬綠如雲護草堂四壁詩無題牘義一春花不放空香貧供蔬筍常畱客老愛烟蘿重去鄉頭白公卿歸未

得天遺清福付疏狂

三橋春游曲和竹橋丈韻十六首

有序

按朱彞尊鴛鴦湖櫂歌備述全郡之士風楊維禎西湖竹枝歌則就湖中比興各從其題也茲亦就城西言之不及他勝蹟鳴絲跼躑無當絃歌若以躑俗之取舍審音之勁柔亦畧可見已

春光多在第三橋第一橋邊放畫橈芳草自青齊女墓卻輸顏

色與裙腰

吳越春秋吳太子娶齊女思齊而病將死曰必葬我虞山以望齊國閭閻傷之如其言葬虞山之巔三橋

一殿橋二程移橋三排水橋

山塘曲似九迴腸綠女紅男集看場誰識箇儂心事苦一生不

買翦鬆餠

自西關至湖橋十里爲山塘翦鬆餠以餽爲之形似角黍

福慶橋西拂柳行春衫雅澹獨分明西湖水色猶嫌綠最好當

頭月始生

拂水橋一名福慶橋西湖卽尚湖對昆城湖而言

八寶車緣石磴回隔層紕纒任人猜風飄紅裏香猶溼知看巖

頭拂水來

報國院前澗水從石橋下值東南風則倒卷如雨巖以是得名

巖墓松杉半作薪高眠春草石麒麟不知卻與雙翁仲閱盡朱

顏綠鬢人

明嚴文靖公訥祖墓在錦峯下

寒食東風祭掃餘中山山路並香與誰翻新樣蘇州髻草草梳

妝愧不如

出秋報門循山足行爲中山路皆冢墓所在

覲面偏逢熟客多嚴公祠畔怕經過障人虧得西施裏小立如

茵輓綠莎

西施舞裏石在嚴文靖公祠後

天女亭亭手散花維摩方丈簇紅霞小姑誤認觀音像歲歲燒

香當落伽

維摩寺在虞山之巔舊塔維摩居士天女像莊嚴妙好吳下所僅見也

松下茶寮柳下壚分明一幅上河圖西城更有重樓閣小李將

軍畫尙雍

西城樓閣處山勝景之一

崔隱菴西竹石斑衣香不斷翠微間桃花影裏桑絲正是吳

鸞欲上山

崔隱菴在錦峯東麓明時建方言鸞作繭爲上山

寶巖灣頭春水連落星港口缺瓜船邨姬插得滿頭柳間趁清

明穀雨前

寶巖寺梁天監初建今廢落星港舊傳有星墜地爲石俱在拂水橋西土俗清明節以楊柳插巖

華表于墳崔尙停豐碑王墓已飄零青山解護賢侯骨寂寞誰

修雅集亭

于宗堯遼東人康熙開爲常熟令多惠政卒於官土民留葬山麓前明令王鈇築城禦倭死難葬拂水巖下陳贊表其墓雅集亭在致道觀北明宏治間邑令計宗道與蔣欽桑悅楊循吉沈周輩觴咏處

邨邨社鼓競喧闌羽蓋珠旗照水鮮一箇浜兜一彎綠燒香浜

獨礙游船

李翊俗呼錄絕潢斷港謂之浜浜兜則又方言也燒香浜在拂水橋西北

大湖田接小湖莊南北划船遊李王四月二羸三月廿年來競

渡罷端陽

李王各祿長興人宋濟邸潘王之變示夢理宗湖州之民得全道士鄧道樞建廟於致道觀西廡鄉人歲

以三月二十日迎賽後又於四月
二日賽諸土神益增華競勝矣

春暉池館已沈湮
水石還招繫纜頻
莫問耦耕堂上事
柳花吹

殺不重春

春暉閣羅忠烈公別墅在程稼橋西今曹節婦祠其故址也耦耕堂在柳水巖下

馬公書院醉歸遲
新月彎環挂柳枝
唱出湖田新樂府
故鄉風

景太平時

學道書院康熙間參政馬逸委建今則爲習家池矣湖田樂府吳集名

送春曲

春風爾來知爲誰
我今送之將安歸
黃雲白沙滿天地
應有雪花煩爾吹
江南已是花如雪
綠波一片傷心色

時興二首

結璘與鬱儀
一天而一海
升沈殊氣候
非力能自宰
豐城獄中
土黝黑
閬千載
夜半雌龍鳴
星漢騰異彩
物亦有所蔽
光氣能不收

世無神仙骨惻惻懷安期出門見秋壑弱水意在斯挂席東海
岸信極反自疑左眺三神山右盼王母池前行懼無崖迴懼恐
見嗤歧途不早辨壯往徒嗟咨迢迢指南車姬公信我師

雙龍澗觀瀑歸憩小石屋放歌

劈開空山翠一條一龍蜿蜒來神霄一龍卷雪向天舞兩龍相
搏秋容驕怪石勢激龍性鬪龍口亂吐明珠跳松爲龍鱗石上
怒石爲龍爪雲中招我來斯須不可立頭上恐壓西江潮但聞
雷霆旬旬走地底山頭蓮花青動搖奇境忽闢洞天清寥靜納
萬象中自昭昭日月不能照其底烟蘿翠碧爲疏寮洞中一勺
水廣可容百瓢斟酌萬萬古不長亦不消得毋卽是雙龍之真
原下通碧海之迢迢方今盛夏草木焦火雲四野當空燒天何
不遣兩龍飛去作膏雨徒令山中噴薄爭喧囂青天不語風瀟

瀟

有感贈次嶽卽用其字字韻三首

羣雀招我飛遨游入紫府仙人睡昏昏
眈眈漏囊字手弄明月珠吹氣闔牖戶
素影不得入宛轉我肺腑不知此屋上
正照月色苦飄風驚琅玕一枕瀟湘雨

桃花紅亂飛不出桃花臨青山屹不搖
白雲自吞吐朝發蒼梧間夕余至元圃
拂落衣上塵猶是蒼梧土兩土萬里合
共此大公宇試呼安期生火棗可立樹

英年負膽氣手搏南山虎酒渴吞長虹
醒時始傾吐此生除君親強項不曾俯
倦游返滄江低首入蓬戶氣伸天地間
而身屈堂宇堂宇百年灰人自足千古
林閒提壺鳥催我提壺酤明月圓玻璃
脆若靈鼉鼓倒持珊瑚擊擊碎我能補

壽吳種石封公敬

先生吾祖之故人同自新安徙海濱結交當代誰白首兩家四
世交如新旃蒙之歲六月五先生七十人祝嘏敢同世俗進陳
言詞愧無文意則古先生本具匡世術堅隱蒼生呼不出獨於
鄉邑任勞怨投以艱大罔敢逸巽官書院次第修更置義田規
制立一時寒士俱歡顏聲譽翕然重鄉邑卽今天旱民罹裁長
河見底潮不來桔槔之聲終夜哀十分之秧七未栽過小暑後
插不得此輩溝壑填枯骸况民蓋藏久無有彊者攫食弱者走
眼前兒女家家空此景忍思秋以後先生愛士民若何當爲此
輩焦勞多酒中滴滴飢鴻淚忍進當筵金叵羅

觀荷李家池

陂塘六月明鏡寒露珠走出碧玉盤花容睡起若初沐太華著

雨秋不乾水風吹來香未遲花香葉香辨難準乾坤清氣惟此時靜嗅令人發深省我情已覺與之化身墮鯨宮夢竟冷日色忽射青林來滿塘齊拆芳緘開青山倒影不得入紅霞一片遮瑤臺我聞佛法蓮花大一箇花房一世界合庇栽黎萬萬千蓮實爲糧葉爲蓋不然化爲五色雲廣蔭綠野遮紅輪不然化作九霄露徧灑芳田似甘澍秋江深兮秋水清蓮子實兮蓮花明漁郎鼓櫂入花去渺渺烟波空復情

過竹橋先生飯

萬戶憂飢死君厨午飯香一餐畱客飽雙淚看民荒或有知時雨誰忘濟世方勸耕傳吏語插蒔日方長

題畫

柳塘一碧淨無塵羣鴨爭知戲水春今日長河乾出底扁舟妬

殺畫中人

秋懷

天教吾輩罷清遊，澤國難通一葉舟。
米貴誰能嚴酒禁，麥荒人尙盼秋收。
金烏照眼山俱赭，銀漢當頭水自流。
我縱簞瓢都告竭，深知不及老農憂。

下地秧枯高地難，大河水落小河乾。
窮民望報裁傷冊，長吏方登禱雨壇。
三日精誠先禁宰，萬家全活仰黃冠。
更愁秋賦催租迫，猶作頻年大有看。

已禁朱門閉糴堅，誰云市價若增川。
官倉況足常平米，長者何勞賑貸錢。
高誼故鄉猶可冀，薄輸歉歲或能先。
惟餘兩眼窮途淚，灑向西風落日邊。

去年秋熟萬人歡，今日秋風已斷餐。
憂患每乘豐稔集，宴安彌

覺薦飢難 九重詔悉窮簷隱卅萬糧賙豫省寬聞道中丞能
入告佇看江左得遺安

七夕詞

秋雲埽淨玉宇空纖纖玉蟾挂天東雕陵鵲羽駕長風雙星耿
耿皆離宮我聞織女織營室牽牛牛負輓下照人間耕與織今
年吾鄉機杼拋五月六月處處聞桔槔織得兩疋布不能代租
賦不如大家踏車去婦人踏車哭當歌勺水不如衣汗多耕夫
插秧日曬骨起視田中秧不活秧不活已七月七月田無禾城
河湮塞去挑河棄耒出門涕滂沱房中織婦悲停梭吁嗟下方
耕織已如許牽牛有靈應挈女上扣九閭告帝主今日降洗車
雨明日降灑淚雨

禽言

井序

炎序亢旱農事旣妨當茲流火之期頓興輟耒之想
嗟乎積麥未空已多饑色剝榆且罄何以聊生雲漢
之詩不作監門之圖誰進識者悼哀鴻于中澤痛蟄
燕於寒山目擊情傷託物起興

泥滑滑田婦踏車脚不韞今日車水明日乾東家秧枯西家拔
爾莫憂泥滑滑

架架格格架架格格扶犁下田土似石大家插時且努力西南
角上片雲黑

脫卻破袴身上莫顧穀再糴種再播一斗穀一石糧秋時糴穀
補爾裳

婆餅焦阿婆看孫田裏苗熱風吹水水易消海塘作壩截住潮
婆心更比婆餅焦

情急了天奈何六月盡七月過家有老野無草雨不來情急了
提壺盧去沽酒邨北邨南久無有勸君莫更向前沽前邨米無
麥也無

得過且過打麥推磨麥再食盡大家餓且莫傷官來催
租身已亡

醉中對月放歌

今我不知明月去我幾萬里清光照作筵前秋其閒廣容八萬
四千戶何不上蟠天根下蟠地窟而令廣寒之宮接九州天下
寒士皆被收曷爲初如玉盤光欲流漸忽如環如玦終如鉤我
欲上與姮娥謀玉斧永禁吳剛修張我乘風帆駕我破浪舟銀
河不可以飛渡望青天而悠悠我登南樓浮雲正浮鏡耶非耶
慙我當頭不能鑒人面目之眞僞但能釣人心上之離憂仰天

大笑天亦愁不如酌我碧玉甌
酒月在手飲酒月在喉求爲
月中之遊不可得還放明月入我胸中遊
玉兔爲珍羞桂枝爲酒籌人閒何處非滄洲
五岳三山焉足求

旅興

兀坐百端集茫茫者誰在灼灼芙蓉花
秋江無人采不采亦自芳日月恐難待
褐父韜玉輝荆緱沈劍彩矧非劍與玉
顏色豈不改昨夜青霜飛西園萎蘭蕙

毋謂爾形匿爾影寂相窺毋謂爾言默
爾聲秋風吹達觀當世事安足喜與悲
死生本一理出世終何爲試問桃花原
拂衣者爲誰此中儻有人吾願攜家隨

落葉草際黃女蘿樹頭碧顛倒或有
時推移歎何極元氣任自然造物詎爲
力不見天上星墮作水底石不見山中
泉奔作川

下澤浮雲遊八荒舒卷殊自適

覽鏡忽不樂之子非舊顏少年遠爲客不知行路難振衣太行嶺立馬山海關奇觀擅天下快若得美官丈夫不濟世跋涉徒辛艱翩然與鷗鳥歸去秋江寒

秋日登西山

我登西山巔四顧天在側上積萬古雲山空怪秋默浩歌歸去來相逢人不識

古意

東陵多美瓜離離襍蔓草中含丹悃在色味能自保無由獻君前抱蔓秋欲老

出北郭登鐵佛寺歸塗憩乾元宮得詩二首

繞郭死秋色孤翠明層巔我思掇其秀手弄雲影妍松逕轉愈

碧羅衣生秋烟探幽古
蘭若寂靜空萬緣深澗臥磐石苔花乾
不鮮風來卷落葉疑是山中泉

白日欲西匿遊興殊未闌
炊烟蕩空翠一抹松林端下瞰乾元
宮寂寞古井寒石牛繡苔碧高臥甲子殘
我欲借騎去一訪仙人壇爲問今年旱
瑤池乾未乾

西莊草堂放歌戲王次嶽

丈夫不能手活蒼生億萬萬便合高臥娛巖阿
君家草堂面山起春風日日嘉賓羅一覽十二峯
青蛾一飲三百杯紅螺主賓大醉各狂笑萬花怒
發爭顏酡五月不雨河無波六月大旱田無禾
水仙庵前石齒齒火雲屋上山嵯峨夜夢酒星飛
入口思君走訪牽烟蘿願君對月酌我酒爲君起
舞招姮娥君顏忽忽慘不樂蛾眉老大悲滂沱而
我大笑嗤君愚勞人逸人得孰多

鳴君白玉珂何如朝雨披煙蓑著君豪豬鞞何如秋風製菱荷
不見張志和蘆中自唱漁父歌不見蘇東坡富貴被嘲春夢婆
人生百歲一擲梭青山笑客頭皤皤君今不樂將柰何吁嗟君
今不樂將柰何

秋夜簡吳頊儒

卓信

空房生秋烟明月來窺我西風閃孤檠人影右忽左落葉卷我
心飛向秋江墮秋江浮萍死秋水貴於金天吳走陰谷鮫客潛
青林盡搗蒼生淚不成三日霖寒雲鎖孤嶂野黑南山泣白骨
照幽泉秋墳鬼聲澀遙知蘆中人掩卷三歎息

有勸作吏以謀祿養者竹橋丈寄詩諷止次韻奉酬

今年貧壓去年貧四壁秋風一病身白雁聲中書劄到黃花香
後穀無新亦知捧檄寧爲吏不信躬耕廢養親我已烟蘿成嬾

癖更勞溫語慰留頻

疊韻示內

閨中一笑兩忘貧歌嘯能全凍餒身赤手爲炊纔見巧白頭同
夢總如新圖書漸富釵環減鍼黹偏疏筆硯親還恐不窮工未
絕開尊勸我興衣頻

季秋晦日之前夕風雨大作凜若窮冬晨起聞有斃於
路者再疊前韻呈竹橋先生

年荒吾已念民貧敢謂饑寒祇迫身况覺元冥驅轡疾旋聞白
骨轉溝新士窮猶有悲啼婦農死應多失養親當事撫循安得
遍如公告訴或堪頻

苦寒三疊前韻

敝裘吾已得安貧一具難遮億萬身卒歲盡憂無褐苦經秋未

見授衣新三千空冀酬緜客七十誰忘衣帛親安得眼前成廣
廈杜陵心事歎嗟頻

病瘡

去年春氣入冬時今日秋風發四支我祇一身憂癰疥誰爲四
野惜瘡痍嗜痂或有劉邕癖剜肉難邀扁鵲醫莫使殷勤乞靈
藥年荒無事告人宜

拜故邑令于公墓

宗堯

墓

公字二鄰遼東人年十九以蔭爲常熟知在任四年卒士民留

葬廬山之西麓

古墓前朝半作田豐碑獨記長官賢人才豈必由高第經濟何
容薄少年四境罷歌畱白骨萬人揮涕送黃泉民財易得民心
貴莫計當時助葬錢

松楸百歲少樵痕宰木人思惠澤存尙有棠陰歌父老從無麥

飯奠兒孫九原合抱哀鴻痛萬里應鵬化窟覓今日墓門甘下拜不曾身受四年恩

題大石山房壁

前明孫艾好結客與沈周吳寬輩友善
盤處山陽崖爲別墅以待游者晚自號
西川翁

何人赤手開青嶂吾族西川白髮翁四海客貪看石過一生錢
爲買山空女牆恰傍齋邊起樵逕翻從屋上通幾曲欄干紅樹
杪坐來渾忘是城中

桑悅墓

少年意氣太縱橫賦罷離騷賦兩京膽敢大言稱孟子目無流
輩似禰衡人甘放廢終高品才要疏狂易得名手采湘蘭親酌
酒惜公夸誕慕公清

婁東陸氏余外家也五畹園者少時所熟遊距今十四

易星霜矣重臨初地爲鏤一詩於石

一宦正飛去片雲方歸來北風吹園中雙扉忽自開初冬萬綠盡寂寞行蒼苔蒼苔多落葉落葉如蝴蝶飛上樹梢頭空樹不能接樹在畫樓前一枝新拂烟此樹我所識無乃天桃妍天桃昔未花與我立齊肩我時八九齡戲在樹下眠今我登樓望樹接樓窗邊園丁爲我語結子已三年此來惜非春不見顏色鮮吁嗟樹如此人其可知矣人顏日以衰不及桃花美樹老花自春人老白髮新有酒不盡醉桃花笑殺人

歸舟臥月

獨客孤舟不成夢嫦娥多情走相送月光滿船如水流不知身在水上舟舟人夜半艣忽止月射窗中直如矢須臾艣移月亦移電光閃爍東復西忽東忽西捉不得忽方忽圓隨所入此時

卻傲家居翁那得月到衾裯中遙邨雞聲喔喔起月漏疏篷一
絲矣天雞一聲又二聲月窺篷底難分明雞聲三啼我夢結明
月不知幾時別

老翁

老翁頭白向前邨左掩啼痕右抱孫子婦一時都轉壑親朋滿
邑莫登門年須帛肉偏窮餓養望雞豚祇夢覓聞說長官方勸
賑但求遲死得霑恩

昨眺

昨眺西山滿目墳西山西去不堪聞城中米粟家家玉海上帆
檣片片雲風急寒鴉方作陣霜多哀雁或呼羣誰人野火燒枯
草莫似崑岡一例焚

乞米

終朝腕脫魯公書金賤如泥米似珠誰爲公西憂老母徒令方
朔羨侏儒文章慢喜論肝膽飢餓眞看到體膚明日斷餐何暇
問縣官卽日又催租

訪子和不值陟西山遠眺

北風吹已休長河曉如鏡君舟向遙邨凍權應難進我來扣雙
扉半响寂無應衝寒涉層岡一覽湖天勝點點帆檣中呼君可
能聽身作催租人或轉得詩興磬磬中澤鴻四野苦饑饉君方
奮然起發粟助施賑取之還與之何如勿取順亦知君敖空未
必塵生甌升斗或有餘孝養足溫清野多一石穀可活十人命
敢恤一冬貧而爲百家病况今緩催科已聞長官令士無牧民
責當體

天子聖凍解好歸來和風爲君慶

冬日由昭明臺取逕登辛峯亭觀落日

出門見飛鳥歲晚吾獨閒白雲先我心搖曳蒼林間古臺木葉落蒼然見寒山高處望不極努力窮躋攀

我游此山巔興落山外山豈知秀絕處只在城市閒憑高覽全邑屋密樹盡刪孤雲飛出城不敢敵人烟吁嗟殷庶風此後幾百年

遠眺殊未已前山已落日偏於欲入時其勢猶似出殘霞明半天并作莫雲黑雲中珊瑚盤反弄黃金色人坐松林中愈覺蒼翠逼浩歌歸去來此意無人識

古意二首

妾家住橫塘荷花礙舟楫雙淚落如珠滴在青荷葉風翻荷葉動不見荷珠圓已隨流水去直到君門前

示日者

十五銀蟾圓十六銀蟾闕
叩時金烏升酉時金烏沒
盈虧顯晦會有時
胡爲茫茫憂不輟
我持義和鞭不能驅
西墜之日一日而兩旋
我操吳剛斧不能修
晷生之月一月而兩圓
嗚呼天運旣如此
人事循環可知矣
我生之後我不知
我不知人何能知
我亦安用人知之

懷遠曲

一室不相知不如萬里長
相思相思不相見
恩情那得愁中變
滄江月落怒潮死
手弄飛霞半天紫
美人於我無所云
書空化作螭龍紋
楚雲寂寂吹高曙
鶴唳寒空不知處

雜感

深谷有幽蘭
馨香久彌存
豈不望人知
不求而有待
弱質性自

貞芳情結千載嗟彼桃李花夕葵朝蓓蕾植本使之然炫極自
罹悔而曰風雨摧而曰節序改

巨鼇戴神山潛伏滄海中風吹山嶽轉一氣天洪濛從空無著
處見出琉璣宮衆態幻彌出人想時有窮人想終無窮可思不
可通揚帆從此逝一問東皇公

天眞閣集卷三

常熟劉光德屬鐫

天真閣集卷四

詩四

昭文 孫原湘 子瀟

柔兆敦牂

早梅二首

梅花如入夢山意杳難知芳草不曾碧美人空所思春風無缺處寒氣有終時畢竟先桃李而能綻一枝

春從何方來萬物皆欣欣各自抱生理以成天地仁梅花得氣早獨出先當春洪鈞本無私非敢私洪鈞本性能耐寒誓自全其真紛紛蜂蝶羣敢逢冰雪辰

偕子和買醉卽送之浙

不飲胡爲者清寒拂面來與君將遠別安用待花開醉傲詩千古春生酒一杯歸來獨長嘯霜月滿高臺

梅花下同席子侃秀才

世昌

我思在梅花而適與君遇東風知我心吹香引人去但覺香益近不知花何處美人何珊珊只在此間住

梅花若有神隨我入板扉家人顧我笑道我看花歸花光在我想香氣在我衣我想人誰覺聞香其庶幾

同項儒蘇耕虞畫師

孫瞻

過龔氏小園

小園閉綠春氣蟄敲轉花陰始得入入門拂面花光迎花氣上熨春雲生春心自蕩喜若驚衣上飄拂東風情東風吹我入花去不覺身如蛺蝶輕身輕倏走花中遍春自天來巧人擅清池不流水欲活小石無峯態殊變同行二子吳與蘇落日花前猶戀戀自言家有二頃田得此偃仰殊安便身後猶留子孫住花時自結賓朋緣絕勝黃金買歌舞不羨丹室求神仙而我聞之

爲慨然可惜百萬青銅錢方今歲旱民顛連呼號四野誰見憐
一園之費作膏雨佇令萬戶生人烟人生堂宇能幾年不見日
涉園太守將以忠池館空流泉不見小欄川御史錢亭臺荒白蓮
卽今田父攜鋤處當日經營美人住百年老樹如人立欲扣興
亡不能說白楊蕭蕭叫老鴉種花人死花天斜不如乘我閒身
在去看人家園圃花

題耕虞詩卷

手君詩卷到黃昏春老江南獨閉門集中落梅句好句似聽吹玉笛
落梅風裏最銷魂

喜雨詩同竹橋丈作

開門正見雨如絲太史傳來喜雨詩一夜小樓春夢破關心不
在杏花枝

春泥雨過氣如蒸菜圃新看碧玉增小市賣油應減價今宵滿
注讀書燈

嬾碧初浮石岸苔官塘私港口齊開海甯夜半帆檣集道是商
船乞糴來

五百青蚨斗白杭一番新雨價應平門前半尺春潮水又便輕

帆海上行

時方嚴
海禁

水利居然郭外多城中藉藉議挑河生憎文學橋頭水如此春
陰綠未波

外河水長裏河渾水柵新看漲碧痕兩岸鳴羣分浴起小舟撐
綠進城門

琴河曲

相傳縣治前後橫港七派如琴絃皆發原虞山東注

運河宏治間知縣張集義曾一濬之今久湮淤或居
民架屋其上或塞而成陸存者學士橋下一絃而已
邑脈梗益山水衝暴爲患乙巳夏遇亢旱或議疏治
此河以工代賑而旋議旋抑予爲此曲以俟後之觀
風茲土者或有復古之思焉

琴河水七條條似絃直儂欲乘舟去東西復南北
儂家門前水歡家門前流流出歡溪口還來儂渡頭
妝臺臨水閣正跨第一絃歡從閣下至不用到門前
去年歡舟來直艤學士橋今年歡書來扁舟方待潮
歡書誤前期儂書幾回促河斷不可開絃斷如何續
儂有雙玉釵助作挑河金如何釵上燕不爲銜石禽
安得琴自調安得河自復與歡聽流水翻作琴河曲

書馮仲廉所撰項烈婦傳後

烈婦吳氏名定生項儒之姊也適項生早夭婦數求死不得旋以疾終項儒哀其志屬仲廉爲之立傳而俾予書其後

平生作詩筆如史論事論其志之始哀哉烈婦以疾終吾自許其以烈死夫死蓋棺戶忽扃不因婢救已自經徇夫遺命謂姑在姑沒偷生更何待死非殉姑仍殉夫奈何絕粒殞復蘇微軀終當自經死覺而解之又誰氏世人求生命不生婦今求死志不成幸天終哀烈婦志不食夫言病立至我

朝旌典禮至隆格於成例情難通吾自許其以烈死哀哉烈婦以疾終

過項儒

良晤不嫌久况逢春晝長拋書兒聽語進茗僕窺廊林鳥啼偏
靜梅花落轉香東風晚寒小已恐麥微妨

題黃子久畫

水自白雲高處落人在白雲行處行行人更上一層去不見白
雲空水聲

寄淵如

聞道雍州又汴州側身天地向誰游公卿燕市徒青眼賓客梁
園易白頭才大卻生空入幕愁多王粲莫登樓江南春色年年
好又見楊花暗綠洲

東湖漁樂歌

吾鄉兩湖如鏡明東湖更較西湖清西湖只種垂楊柳東湖多
種蓮與藕西湖只種天桃花東湖多種桑與麻亦有桃紅柳碧

處此中定是漁人住漁人門前春水生春水正活春船輕君家
湖頭我湖尾放船只在湖心裏朝打魚兮雙鉞鱗暮打魚兮鱸
如銀得魚且換一壺酒除却白鷗非我友飲酒且看一角山青
山以外皆人閒有時白鷗邀我去直到青山倒影處漁人之樂
樂何如得魚不用輸官租東湖之樂樂無比一笑披圖可去矣
君不見路旁丹旆老京畿日望功成始拂衣

緩歌行

亭亭南山雲挂在青松枝春風吹之去浩蕩無還期人生舒卷
貴自適安能促促營栖遲晉朝羊公一片石鬼火千年照衰碧
金屋灰成蝴蝶飛青苔猶作雕闌色造物於我殊有情上天下
地眠縱橫鳳凰翱翔極寥廓何必岐山竹實相和鳴文康老親
老不死生不知愁不知喜蒙頭掩面白雲中世上萬聲不到耳

題楚江幽思圖

耕虞少日隨其叔遠安令

汝礪

客西陵

汝礪

能詩所

至輒題詠耕虞撮其詩意爲楚江幽思圖十二幀間

出索題因次

汝礪

韻一一詠之

守風鹿角灘

大江橫架石爲梁風緊雲愁一繫航山斷中腰無地接水迷極
目與天長西陵樹盡桃花豔南國泥多蕙草香不是前身爲楚
客卻疑詩畫總荒唐

南津懷古

吳漢軍容蔽楚天荆門高壘付殘煙浮橋空鎖江三面飛炬終
燒騎五千水上風雲秋易變峽中日月曉同懸茫茫今古羈愁
處都付啼猿落葉邊

雨泊紅花臺

楚雲偏重楚天西，烟雨蒼茫客思迷。
獨艇橫江秋色遠，孤城背嶺角聲低。
三湘旅鬢驚寒雁，千里歸心赴曉雞。
明日片帆何處泊，數峯青峭不堪攜。

西陵峽

一灘聲過一灘催，一日舟行幾百迴。
郢樹碧從帆底盡，楚臺青向艣前來。
奔雷峽斷風常怒，障日峯多霧不開。
險絕正當奇絕處，壯游毋使客心哀。

新灘寓樓

飛飛烏鵲繞南枝，萬象初呈月上遲。
雲吐碧峯同縹緲，水吞丹樹倒離奇。
大江東去秋如畫，爽氣西來夜入詩。
樓下灘聲樓上夢，三生鴻爪悟前期。

荆南道中

城上風雲入壯圖，兩山雄峙夾南都。
三朝三暮牛形在，九十九洲龍氣無。
宋玉宅荒惟賣酒，劉郎浦冷尙遺珠。
送人一夜江樓月，飽聽猿聲滿去途。

蝦蟆碚

寒崖古雪弄飛泉，一櫂貪從石罅穿。
楚國文章多諷諫，漢江雲雨半神仙。
鐘聲白帝城邊寺，帆影黃陵渡口船。
擊楫莫憂風未便，此生何事不隨緣。

南沱曉發

殘月相思正滿船，曉風吹得楚帆偏。
山鄰巫峽多疑雨，路出空舲半上天。
屈女寒砧秋自寫，江妃瑤瑟夢難傳。
美人一賦分明在，葉葉幽蘭似汝妍。

三游洞

洞口秋風卷綠蘿，新詩題壁繼元和。
山空鳥鼠雲無蹟，碣走龍蛇字不磨。
才子定逢芳草住，騷人偏宦楚江多。
忠州刺史西陵倅，一例風流付郢歌。

黃陵廟

在宜都黃牛山

黃牛峽口鎖奔流，廟食千年鎮此邱。
楚塞寒雲沈戍鼓，荆門晴日澹靈旂。
元圭功力扶神禹，丹嶂碑文重武侯。
帝子旌旗非此地，枝枝斑竹也撩愁。

暮江送客

冥冥愁思入鴻羣，下馬寒皋酒半醺。
吳下有家偏送客，楚天無樹得離雲。
山當巴峽三峯峙，水到枝江九派分。
君未解帆吾欲別，可堪風笛醒來聞。

彝陵冬暮

彝陵風物歲將更官閣題詩白髮明神女臺空寒雨過水仙祠
暗綠蕪生離騷偏漏梅花詠哀怨常聞竹樹聲我亦吟成添楚
思此身何日畫中行

耕虞家藏文衡山摹東坡先生蒲團小像

東坡先生尚忠義文章已特其餘事卽論文章莫與京起衰八
代昌黎繼昌黎闢佛不遺力先生以禪作游戲是時朝廷任愴
王擠排必欲置死地隻身負罪遷海南萬里君門遠莫致日星
無輝川嶽幽目視耳聽皆招忌瞑坐蒲團待死生猶是天王聖
明意豈有光明俊偉人而甘寂滅以自棄當年北闕攀龍鱗上
書不減佛骨議苟其與韓殊好惡烏得與韓同正氣我知并非
公游戲千秋一片孤臣志此圖衡山眞手蹟公之裔孫耕虞得

邀我題詩三歎息嗟公此志無人識何不盡公守武林歲旱饑
疫交相侵大開常平解囊金饘粥藥劑活萬民不然畫公開河
法茅山鹽橋造堰插湖中種菱人荷鋪兩岸芙蓉楊柳夾卽今
吾邑旱復荒飢民絡繹道相望長河湮塞阻四鄉大雨十日波
不揚懸公兩圖縣門口人心荒旱或不忘或者更思效公法片
紙之澤其利長何致世閒佞佛者紛紛藉口公濫觴耕虞善畫
知其故遊戲之中規卽寓

大雪同項儒及其仲子

庚金臥味經書屋

門外紛紛雪不止吳君謂我且住此一榻祇及三尺寬外容兩
人內稚子木縣之褥大布衾醉眠如在深山裏枕上忽聞嘅息
聲我呼吳君爾且起爾昔自賣負郭田萬卷縹緲百城比一寒
至此非所知今之嘅息何爲爾君曰咄哉爾何忘不見年荒已

若是西鄉十家九家逃中夜哀鴻徹人耳比聞淮徐荒更多弱者竟供强者匕兩股已作釜中肉宛轉道旁尙如蠟况今天怒殊未回滕六飛廉逞其技食人之肉難寢皮强者亦死弱亦死三人抵足凍欲僵念此哀哀痛何已我呼吳君爾且起何不手書十餘紙夜半夢中扣帝關綠章上奏九天紫玉女收回六出花萬方敕賜豐年喜而君大笑嗤我狂梯雲安得王喬履余曰不然君且行去訪南山中道士點石可以成黃金裁雲可以作絮被大濟天下寒與饑布粟不煩機且耜而君大笑嗤我愚乘風安得琴高鯉吳君吳君且奈何不如千金去求仕一官朝除百里宰夕救萬民興發始不則城中足穀翁有實其積萬億秭與爾夜登虞山巔爲民慟哭呼庚癸君曰爾愚何益深君曰爾狂何益侈求人更比求仙難得官尙是登天邇嗚呼予智亦已

窮莫如反而求諸已歸家盡賣屋與書向婦脫取簪與珥買布
千疋作衣裳買米百石雜糠粃施捨作民溫飽資可免逃亡與
移徙是寧慮人或掣肘卽亦甘爲衆謗毀問君此計得之無君
曰車薪一杯水乾坤虛生我兩人庇其本根輸葛藟目擊顛連
救不得惟有飲恨入骨髓商榷終宵不忍眠喔喔雞聲起邨市
牀中稚子方夢醒夢見流觴尙湖渙恍然自悟予已忘大雪紛
紛暮春矣起來呵凍紀其言并誌歲月例如史乾隆五十有一
年三月三日春上已

春寒

三月風兼雪江南竟不春清明猶斷火城市盡無塵野曠添新
鬼山空少祭人開門飯饑饉或恐是宗親

耕虞花卉冊子

畫花如帶露未晞畫葉如暹風欲飛黃筌徐熙不可作近數耕
虞老布衣耕曠作畫不用骨塗以丹粉神自活不根而生不藥
成造化在手元氣奪二月羣花正怒開花光直射紙上來忽疑
卷中花逸去散作春城千萬樹三月花飛殊可憐畫師門巷春
如烟卻顧卷中花自在風雨不曾顏色改曾中嬰涵萬物春豈
獨畫手春常存榮枯盛衰置不理春老江南獨閉門

結語用
耕虞句

湘江濯足圖

男兒插腳紅塵裏芒屨頭穿不可洗慨然投足萬里流瓊瓊踏
碎秋江秋貝宮驚起青花蚪怒噴雪浪君山頭洞庭雲黯帝子
愁靈旗八龍紛翔遊中有屈子沈冤幽秋聲水底風颭颭水之
清兮可濯足水之清兮不可以解憂二十六灣深復深勸君濯
足先濯心

鷓鴣曲

曉日鷓鴣啼鷓鴣作何語行不得也奈何許佳人洞房淚如雨
片帆迢迢何處飛東風渺渺巴陵西西陵江水條條碧送君行
處傷心色武昌楊柳空紛紛水色不上君衣裙君衣自照巫峽
水君帆猶帶樊口雲春雲一重水一重夢飛不過祁連峯明朝
鷓鴣啼聒聒妾夢遼西安得達

田莊歸舟宿白雲栖曉尋鶴峯秦坡諸勝

人躋渺雲際犬聲來水中僧扉照月影上有百尺松風吹鱗甲
動天矯如虬龍我來不敢扣隔門聞梵鐘鐘聲不出山知在第
幾峯峯高不可數况有雲千重

小樓吾不到今已八九年松閒一輪月猶似當時圓人心與時
改松影老不遷月挂青山頭終古爲娟娟我來能幾度與之同

悠然抱月臥終夜萬壑鳴松泉

樓前白雲飛樓上白雲住雲外包白雲雲中碧桃樹曉烟正如
水人誤桃源路漁舟遠欲來東風不可渡清磬數聲飄飄入白
雲去

萬峯雲壓住一峯雲上頭振衣躡千仞長嘯白日愁雲從足下
起勢涌山欲浮翻身入雲去心與雲俱幽正從雲斷處遙見水
下流白龍自天來其原不可求坐觀逝者機一息其能留

移居日書學士橋舊壁

我家此屋五十年今朝別去心茫然自曾祖至我子姪歌斯哭
斯已五傳南軒我祖所息肩東房常侍我父眠玉梅四株在院
北乃我幼時手植焉一株紅杏樓西偏花時照我臥榻前五月
結實大如拳兒童遍得嘗芳鮮一朝盡付他人手出門所抱惟

殘編鄰對我涕淚漣而我大笑看青天太虛白雲作宮室倏
忽變爲雙紫烟男兒四海爲一椽孰吉孰凶隨所遷卜居安用
離騷篇

由中峯達三峯寺用壁間梅邨先生過藥公語舊韻

絕澗幽崖恣討尋招提一徑繞煙林雲將天外三峯畫風入泉
中萬壑琴便擬赤松辭世事偶參黃蘗悟禪心僧房小語前朝
夢花落重門幾寸深

初夏寒甚

不是寒如此窮簷已苦饑大家衾盡閉小滿麥猶稀撫卹知誰
任常平計已非醪醑花似雪况乃嘆無衣

筠樵自山中歸過訪

綠樹陰深一徑開茫然雙屐踏蒼苔座中笑指烟霞起人自三

峯絕頂來

古意

君約歸期五載前
丁寧江水送歸船
登樓望盡征帆影
花落橫塘又一年

邵大虛中自萬安歸五日便去詩以送之

相看竟無語
不見每相思
骨肉奔饑餓
親朋老別離
十年遊子夢
五日暫歸期
更憶君家弟
西江照鬢絲
君始見衰父
如何便放船
晨昏非不念
貧賤亦堪憐
別淚黃梅雨
思親碧海天
遲遲行莫遽
相見更何年

寄遠曲

二月雪霏霏
送君登舟去
雪落君衣裳
道是風前絮
君去一月餘
楊花滿衢路
花飛過春江
妾心與之渡
去年奉君歡
花發江

千樹逢花憶去年已恐傷遲莫況是風雪中淒淒送君處寄君
雙鯉魚願趁江潮汴待潮潮不來淚落如清露書不到君前何
由達情素寄書不可必安得與君遇

卜居城東一月竹橋丈元直壽君頊儒子侶鮑凌客秀
才偉攜酒芍藥花下爲煖屋之會卽席呈諸君子

孫子不樂居城南城南屋多遮好山移居城東頗幽曠一桁青
山青入巷山頭古翠飛若來東風吹我雙扉開開門正在綠陰
裏遠聞酒香輒心喜酒香何處移芳尊擔頭蝴蝶先入門故人
聯翩來煖屋不速客三今得六六人圍坐萬花前臨風把酒如
神仙酒中落來花不定正好藏花作觴政杯中搗起一點春滴
酒不得霑我脣一搗再搗花不得請君且浮兩大白我時執壺
坐酒旁客咸勸我飲一觴主賓陶然各盡醉翻借花光照人睡

客因愛我兼愛廬謂我斯廬宜久居我今愛客還問客得錢何不頻相覓

風木圖爲項儒作

吳子著書約喪禮書成投筆泣而起凶禮人子不敢豫嗟余何獨非人子昊天生余或無罪十月呱呱老父死慈闈一身兼怙恃十歲教讀經與史讀書稍知顧復恩天平又遽喪吾妣竄竄孤立三十餘僅有室家鮮兄弟平生不識定省文小孝猶能養口體東鄰新貴捧檄喜手進盤匱具甘旨西鄰爲親遠負米到家歡然啜菽水獨抱哀情莫可申吾亦屬毛與離哀春零露兮秋肅霜愴焄蒿兮潔修祀思孀嗜好不可知思耶笑語胡可擬膝前二子已垂髫大者拜跪小跛倚吾不如兒有阿耶吾不如兒有母氏昊天生余果無罪忍令孤哀一至此孫子聞君言未

已淚泫泫兮不能止我有衰親官萬里瞻望白雲去天咫尺昨宵
夢踏我睂峯曉來仍隔錦江淚君今示我風木圖庭樹蕭騷滿
人耳

桃源圖

洞中只許春風住吹出仙原一釣查如此水清魚不見滿溪多
是碧桃花

王翬畫四首

一綠陰藏一樹花有桃花處有人家看山步出柴門嬾別啓花
間小牖斜

萬箇琅玕翠不分草堂清影弄紛紛幽人閉戶白雲裏世上秋
聲都不聞

月影在地松在天天風吹落露珠圓松聲夜半蛟龍起應有月

中人未眠

幾株老樹綠藏屋數疊遠山青入門世上熟官誰夢見江南六月水雲村

醉飲項儒齋中放歌示仲康

好酒不論濁與清好客不論富與貧吳君家徒四壁立座上往往羅嘉賓朝來折簡邀我去云有遠客來潢涇相逢不暇道故舊一飲且盡三十觥醉中不知我已醉仰天大笑成春聲太虛浮雲若紫蓋倏忽變爲白玉城若有仙人朝帝京雲中往來吹鳳笙隨風散作鳥飛去浩蕩八極茫無垠月有圓闕成晦明花有開落分枯榮不如化作風無形不如散作雲無情飲酒飲酒且盡醉酒中亦豈能青春我聞瑤池之觴取液于金壺武帝飲之何以終亡身中山之酒流膏于玉瑛穆王得之何以非長生

洗我盞兮酌我鐺東海不涸西河傾今日不知明日醒烏虛今
日莫愁明日醒

題筠樵空山獨往圖

君今抱明月西上最高岑白雲萬古色天際橫輕陰凌虛發高
詠流作空山音空山本無物不在徑鬱森我心與之然隨處皆
山深在山作山想空際外物侵君能空耳目先使空其心我欲
從君遊赤手捫秋參長風吹我心挂在松樹林萬象杳無迹思
君何處尋

太真春睡圖

豬龍掀天作雲雨驪宮霓裳醉難舞繡榻絲縈小篆煙海棠睡
足春無主是時三郎猶御宇九華春殿臨仙藥力士休傳進荔
支念奴自去調鸚鵡看花有旨莫傳宣鬪草無人敢私語金鎖

玲瓏閉六宮一聲動地漁陽鼓天子徬徨走如鼠龍武將軍猛
如虎妾誠負國死無所不死官中一杯土梨花樹下繫羅衣何
似華清春睡時自昔賢妃戒同夢爲君日詠雞鳴詩

悲知己

伯牙來子期喪季札還徐君葬當時不相識琴劍無顏色一朝
相逢肝膽照鷗鵲萍花鳳凰叫金飆未肅玉樹凋騶駟夜斃狐
兔驕腰間玉龍秋水澀匣裏紫瓊寒露泣城頭月白烏夜號碧
雲不動蒼旻高青霓扣額闌者詈九關虎豹天門閉我欲招君
覓上君墓碎琴不彈解劍不顧從君逍遙八荒去鞭螭駟蚪爲
君御

薤露歌

薤上露朝易晞昨日生人今日尸昨日耶孃相對面今日有目

不復見昨日妻孥相爾汝今日有口不復語譽汝不聞毀汝不知怨家稱快所私銜悲平時封殖心到此百不理但見黃者金白者米大者珠小者珥輕者紕重者綺一齊付與他人矣落得灰飛半張紙

將進酒

報國助邊餉守土團鄉兵人生忠義事多是黃金成千金買顏色萬金買肺腑見人口樸訥黃金自能語一朝流光苦相逼金高如山買不得烏虜功名富貴徒爾爲不如酌我黃金罍

長歌續短歌

木鷲胡然而飛木雞胡然而啼鳳凰栖于枳棘雖有梧實不得食欲飛九天大力不得前機巧自遲不以氣而能運我焉知之知之我何言但見南山作平地漢水流西川金銀宮闕化爲雲

與烟嗚呼長歌兮短歌悲從中來淚滂沱

巫山高

屈平見疏靳尚忠朝雲飛入懷王宮朝雲來自巫山巔變化百態紛嬋娟翻乾覆坤弄秋雨瀟湘萬戶無人烟羲和日車走不到楚臺那得瞻青天巫山遙遙隔漢川何由卻至君王前君不見高宗求賢傳說用美人不入深宮夢

赴金陵作

乾隆歲丙午閏七月中旬清晨戒行李逝將去金陵我僕已船頭我行猶水濱同伴怪我遲收淚語酸辛我母五月病入秋轉加增血枯痛徹髓氣散思亂神巫醫罔有效晝夜唯哀呻侍疾本無狀仰呼皇天仁昨日母呼我汝往結良朋方今屆省試盛時宜亟乘汝父遠在蜀日望汝成人我病雖則劇汝捷我或

興再拜受母命欲去終逡巡金陵六百里中隔大江津一去五十日音信通難頻母痛或呼兒呼兒豈能謦決然竟勿往又恐傷我親去住兩不可此意難自申含悲屬少弟湯藥賴汝身牀前強言笑出門涕霑巾

京口夜泊同子和筠樵

同行無二子此景定凄然月色不到地江聲如上天殘星搖水外清夢斷蘆邊卻聽孤鴻語冥冥墮曉烟

江行取道新開河

忽收萬頃碧琉瓈一逕烟深水鳥啼千嶂迴懸孤日瘦雨崖中走片帆低宸游屢過恩波在官柳新栽物力齊早爲居民卜豐歲家家禾黍屋東西

泛舟秦淮喜遇淵如

八月秦淮水無人亦可憐月將波作鏡花與酒同船乘興還高
詠凌風去采蓮停橈借相間一笑畫橋邊

燕市一尊酒酒乾手便分常思少華月只隔太行雲洛下曾招
我江南又見君相看竟無語一水蕩斜曛

吳江史赤霞秀才

善長

關洛分襟集

烟月江山一卷新苦將詩筆鬪風塵傳聞洛下多才子悵望秦
雲似美人杜曲鶯花愁爛漫夷門屠沽歎沈淪重溫舊雨江南
夢只似松陵水上蘋

金陵懷古樂府十章

長干里

生小住長干不識長干里郎道分明妾家是長干花花桃李長
干人人羅綺西家蝴蝶東家裏門前春風其來矣珠箔無人自

卷起

莫愁湖

莫愁湖中水曾載幾人舟莫愁湖上月曾照幾人遊水波長繞石城流月明長挂石城秋我來莫愁湖此心愁復愁

瓦棺寺

土窟開瓦棺啓老比丘幾時死玉爲骨霜入齒青蓮花吐舌底蓮生花不生子生非生死非死老比丘幾時起

孫楚樓

金陵城頭月照我尊中酒月在晉朝時曾落子荆手樓上年年春酒香樓中酒人去已久把酒酹君君知否一滴不到漱石口寂寞樓名復何有

桃葉渡

郎歌渡江曲勸妾毋徘徊明年自迎汝只待天桃開天桃花紅
如妾願江邊日日候潮回潮亦竟不上郎亦竟不來落花寂寂
飛蒼苔

邀笛步

青溪水清似雪柯亭竹堅似鐵下車來三弄畢上車去不作別
兩相知不相識如此江山如此客六代風流一枝笛

鍾山草堂

鍾山何盤盤草堂在其巘中有濫巾人非隱亦非顯事君誦經
文休沐逞機辯未妨菱荷裂不礙菰韭翦佛法尙圓通白雲任
舒卷嗤彼孔德璋移文昧釋典

雨花臺

雨花滿天金滿地羣臣輸錢贖皇帝耽耽天狗取人肝宗廟翻

無血食祭淨居殿中索蜜時何不天廚獻珍味古來亡國不足異快哉自得復自棄

燕脂井

美人情重江山輕井中墜日抱兩星
轆轤誰轉銀牀聲蛾眉不作井底泥
獨足翻上高臺行高臺行美人尸自青
溪橫回頭卻顧景陽井可惜中無水一泓

江令宅

隋師卷地來萬戶生秋草青溪尚書家
朱門空輦道尚書開府江都早輦道苔
深人不埽惟餘壁月照空庭還似宮中後
庭好

小橫雲曲

欲落不落春山霞山南山北皆桃花花
光釀天霏五色雲閒縹緲仙人家仙人
珊珊有仙骨春風不吹雲自活銀灣飛
渡水無

痕皓腕玲瓏翦秋月月在瓊樓第幾層夜深月與人俱登樓中
有人春自煖碧雲流出皆如冰冰入玉鑪紅片片正似仙人醉
時面忽開一朵青蓮花卻在星星火中見蓮花如雨帶露燒蓮
心最苦香難銷仙家自有不死草別長九節菖蒲苗金銅仙人
漢廷倒鏡裏明姿越嬌好珠圓玉露滴秋江涌起三山天未曉
芳蘭笑人春夢長遠隄三十六鴛鴦隔花望見水雲起不知花
中是故鄉朝乘青鸞夜乘霍我道不如故鄉樂雙成未必愛瑤
京洞口紅藤礙花落

夢橫塘曲

赤城珠樹啼早鴉城門洞開埽落花花飛散作百蝴蝶下有春
雲百層接春雲蕩漾如春波欲渡無梁柰爾何東風忽作艣枝
響便若乘舟自來往權歌直破橫塘烟橫塘女兒正采蓮蓮花

開金薜蓮子生比肩青天皓月本無對映水亦成雙壁圓而我
遇之心悠然孤帆不飛亦不還前汀茫茫忽疏雨十二烟巒不
堪數老魚吹浪如山高駭元雲兮驚怒濤湘神降兮鼓瑟屈子
墮兮歌騷雷憑憑兮風蕭蕭望不見兮心煩勞白浪中分扁舟
忽落十洲前橫涌起五嶽峩峩怪石塞天地白日不得照樓閣
石爲蓮兮雲爲臺寡寡嗟兮饑援哀冤寂處此兮心爲摧鸞車
玉女兮珊珊而自來仙人住何鄉疑是漢皋女回首失洪波不
知此何所水非水兮山非山身無著兮竟欲還閃銀釭兮耿長
夜颯金飈兮扣玉環忽驚起兮四顧羌迷昧乎前路覺向來之
山川乃夢覺之飛渡秦皇漢武求仙人童男卯女白髮新世間
何事可信真夢中便是飛仙身

別秦淮詞

西風吹縹緲淮水六六鷺鷥盡驚起不知何與廳中人令我秋
心蕩難已秋心不定上下潮殘星無聲學水搖回看博山爐中
火亭亭紫烟直一條玉簫聲吹涼入骨美人如花隔瑤闕東方
漸高奈別何飛出孤帆挂秋月秋月送我秋江頭垂楊弄色明
畫樓江水分流自東去客心西望長橋愁橋下芙蓉嬌欲語橋
上游人歌白紵九疑峯頭一片雲直向江南作疏雨雨飛點點
江樹昏不如離人別淚痕輕舟載我渡江去遠夢仍來白下門
白門秋草芳華歇埽盡寒煙青不滅我行草上碧無痕我醉花
前不知別飄然揮手游北溟鯨魚跋浪竟氣醒烟消日出大江
上欸乃一聲山色青

憶青谿詞

騏驎夸逐日祇覺日在前鵬善搏風或遇風回旋玲瓏一寸

心皎皎似秋月眼看越江花手弄燕山雪蓬萊弱水不可以舟
渡而我此心飛過無痕迹何況青谿波一碧昨日放船白下隄
今日權歌京口西回看江樹不知處啞啞但聞烏鳥啼烏啼失
卻青山影西風吹來片雲冷我心與之俱欲飛卻阻碧琉璃萬
頃悲來乎我心本如活水流倏忽膠如淺水舟何當大江作春
酒一瀉胷中萬斛愁

板橋曲

板橋橋下波照儂與歡面人隔一重牆影已先相見
歡乘落月來曉踏濃霜去日出板橋邊莫認歡行處

白門柳枝辭

花下聞歡白馬嘶不知歡已在西谿歡心何似隄邊柳受盡東
風卻向西

送歡已過桃葉渡別歡又近莫愁湖欲倩垂楊繫歡艇情長還似桺條無

登報恩寺浮圖

縱目皆秋色金陵儼畫圖江山千古壯宮殿六朝華飛鳥翻在下白雲如可呼未須登絕頂身已近天都

謁晉卞將軍墓和筠樵韻

山頭望廷尉廷尉山頭望歷陽兵火來將軍智勇尙關獨先劉超身不辱任讓肝膽溫嶠同膂力鍾雅上方其立朝時率意行直諒顧命同受詔福性獨蒙謗深非量錯謀敢與庾亮抗一戰東陵亡孤軍北闕向青溪兵再屯蔣山火偏王燼灰燎城門餘燄熾營帳背創患未合力疾氣逾壯何須良馬足儼吞狼子狀國賊縱凶渠毅寬永惆悵慷慨就義死日月爲陰障朝中塵汙

人柱石孰可仗橫挑賊渡江強驅獸走壙二子同國殤三良並
藁葬能報君父恩用作子臣樣清談諸名流千秋孰得喪堂堂
卞忠貞孤墓空依傍

淵如席上觀漢長毋相忘瓦

銀蟾夜閉長門寒青瑤亂繡苔花乾酸霜沁入土香紫鴛鴦凍
合秋冤死玉階墮葉催題詩回文不敢書相思君恩覆庇六宮
重高遠猶能護妾夢天長地久一片心火雲燒得陰花深長陵
秋風漆鐙黑金銅仙人露珠泣冰紋揀出劫灰中一種思君字
可識

再賦漢瓦次子和韻

羽陽瓦柳秦甘泉瓦稱漢狀若鏡一規價值緋數段凱門飛獨
全長平震未斷昆吾製何工咸陽土不爛飛鴻篆離奇長生字

璀璨茲日毋相忘其義費深玩不著何宮庭知蓋誰輪奐三十
六離宮一百四別館定非銅雀臺亦豈金鸞觀或從鳩鵲遺可
作鴛鴦看攜來自關中搜得由巖畔薰香類鼎彝襲錦若圭瓚
土蝕字未甌墨搨光益煥陵闕久成灰邱墟已難按獨與山川
存豈有鬼神扞香姜真莫齊元光屢難亂刻印篆文摹作硯墨
瀋灌磁石引不來金丸進休換傳觀豁塵眸臨池煩妙腕神物
好護持風雨起天半

呈袁隨園太史

校

海內詞壇幾箇賢風流文采讓公先中年宦興陶彭澤外國詩
名白樂天屈指無多前輩在及身早似古人傳商量循吏還文
苑青史應分傳兩篇

竹樹烟雲護四鄰謝公墩畔老閒身官辭北關心情嬾宅仿西

湖面目新健筆獨撐詩世界鴻才小試野經綸蒼蒼位置文星巧六代江山著此人

歲歲梅花夜夜簫詩仙奇福始能消文章倉卒皆千古人物依稀似六朝坐有春風常自煖客如明月不須邀誰知陶令歸來日反使公卿爲折腰

二十三房小洞天不曾放過月空圓龍門御李皆名士崔髮看花比少年民愛仲卿前令尹世疑陽五古神仙得公一破才人例福壽聰明事事全

贈汪容甫明經中

我未識君而君名在我耳乍見不相知間名乃各喜訂交出曾肝論文慧牙齒著述富丹青功名薄青紫自言六百篇君撰古文稿六首頗該十七史手抄雖有人身死付誰氏予曰君勿憂顯晦有

時爾 本朝推巨手前輩可屈指寧都與堯峯望溪及芥子惟
君繼四家而獨樹一壘羣公皆顯達四海競誇美君今困賤貧
人得肆譏毀不見山上松不見陌上李歲寒乃獨殊春陽詎足
恃喜捨置道場潛沈或井底千秋萬歲後安必無知己且沽新
亭酒共斫青溪鯉一往桃花潭深情似春水

江月謠

青天倒影秋江底一鏡沈沈飛不起乘風挂席鐵網撈珊瑚不
漏老兔逃大呼嫦娥踏浪走翻然睡入天吳數修羅忍饑不可
噉金餅挂在驪龍領安得洪鑪煎水乾泥沙檢出白玉盤不然
願借湘神力手抱蟾蜍出鮫室青蓮居士興太狂徑思入水擒
吳剛金波蕩颺捉不得四顧茫茫江水白

采蓮歌

大婦采蓮花蓮花映面光如霞中婦采蓮子蓮子剖心香不死
小婦采蓮先折藕花落子稀猶得偶回頭看小姑不語弄荷珠
驚醒紫鴛鴦風翻濺繡裳爭道小姑小不采並頭早岸上紫衣
年少郎知道小姑心性巧滴水作珠顆水翻珠亦墮掬水入荷
盤依舊如珠圓盤傾水畱半圓轉仍堪玩盤側水微畱小珠圓
自流藕絲纏綿有時斷葉上荷珠孕常滿

對酒行同淵如作

男兒三十不快意便當高築糟邱臺長江變作春酒碧萬里瀉
入玻璃杯酒杯自寬四海小人生行樂苦不早要等金魚解佩
時武陵桃花笑人老黃金能買如花人不能買取花時春春時
一刻買不得春人日減如花色卽今秋月挂柳枝柳枝青青曾
幾時與君高歌長安市花賤如泥酒如水與君相遇秦淮樓君

今蕭蕭已白頭昨日芙蓉花今日秋江雪飛雪語飛花風前幾
回別斗大黃金印懸肘何似一卮常在手與君飽看金陵城頭
月暢飲金陵市中酒願月常如酒尊圓願月常隨酒人走頭上
月不缺手中酒已乾重斟紫金盞再進顏玉盤手中酒未盡頭
上月又闕安得碧瓊膏爲補白玉玦萋萋草沒黃公壚花間在
自呼提壺一回相見飲一遍人生能得幾相見

燕子磯望江

石壁翻江勢動搖荻花蘆葉正蕭蕭青山有意暮三疊
三疊三峽臨大江
排_{三峽}白浪無情送六朝帆影不分京口樹鐘聲如答海門潮
三峽排
心慢擊中流楫且看魚龍出沒驕

玉京篇

樽桑花落銀河涼瑤池碧草爭人長九關玉狗守金鑰璇宮怪

吐圭壁光朱衣大吏抱笏睡帝旁玉女搖明璫白雲顏空蔽秋
月露溼兔腳蟾蜍僵山薌曲啞謠技奏雕欄蛺蝶翻霓裳龍耕
紫煙瑤草死巖頭老桂辛不香碧桃迎人貢妍笑王母掩面啼
新妝二十八宿黑如漆玉壺酒瀉春茫茫

仙人篇

題某女
郎遺照

我思仙人在何鄉琳宮玉藥春風香欲往從之弱水長四海壁
立秋茫茫芙蓉城空露珠滴中有仙人玉顏色若待青鸞寄素
書細將綠字回文織天風蕭蕭若有思我來何處雲不知生前
手種碧桃樹至今常夢花開時花開春風不任恩花落春風不
任怨人願花如不死仙仙家生死何人見許飛瓊黃雙成都是
桃花短命身白雲一去不復返於今人羨爲仙人雞皮老嫗苦
修行絕粒餐花有誰信秋霜不點姮娥鬢

獨酌徑醉北麓尋清真觀故址

舊爲女道士所栖今廢

十月曉寒生山城酒正清一尊空雪意萬壑嘯春聲紅葉似花落碧苔無鳥行閒吟華山女韓愈若爲情

送顧容堂孝廉

王霖

赴禮部試

獵獵北風吹雪寒一尊酒盡上長安乍離席帽文章貴未著朝衫出處寬聖代轉愁奇節少賢書已覺盛名難願君消盡英雄氣策馬蘆溝自照看

玻璃燈歌

千年老冰寬嵬鍊鏤雪裁雪作燈片四面空靈照見人銀蠟一條翻不見火珠紫焰從中然風吹不動凝青煙觸手寒生始隔礙到眼朗徹無中邊蔽蔽燈花落雙藥宛若明星墮秋水仙人細翦月瓏玲圓輪化作方壺形太陰凝精凍不裂截如鷺肪扣

如鐵陽烏當空照無力燧火星星豈消得何人上繪花草紋太
虛無物生微塵不如蘸水一洗去還爾寒冰面目真

長至第九日同竹橋丈次嶽壽君子和頊儒筠樵凌客

及鮑叔野秀才

份

作消寒會分得寒字

煮酒燒鐙續古歡玉梅花下影團團雞豚近局何辭冷鷗鷺同
盟未可寒身暇儘拌長夜飲月明最好故鄉看坐來恰比香山
社只是相期白首難